



## Il Departament federal da l'intern DFI tschertga ina/in

### EXPERTA U EXPERT PER LA SVIZRA EN IL COMITÉ D'EXPERTAS E D'EXPERTS PER LA CHARTA EUROPEICA DA LAS LINGUAS REGIONALAS U MINORITARAS

La Charta europeica da las linguas regionalas u minoritaras (CS 0.441.2) è vegnida concludida l'onn 1992 a Strassburg. En Svizra è questa convenziun vegnida ratifitgada l'onn 1997 ed entrada en vigur il 1. d'avrigl 1998. L'intent principal da la Charta è la protecziun e la promoziun da la diversità linguistica sco in dals elements ils pli prezios da la vita culturala europeica. Ils stadis contractants s'obligheschan da rediger mintga tschintg onns in rapport davart la situaziun da las linguas regionalas e minoritaras sco er davart las mesiras prendidas per realisar la Charta.

Il Comité d'expertas e d'experts è in gremi independent ch'evaluescha la realisaziun da la Charta en ils stadis contractants. El è responsabel per realisar il ciclus da monitoring ch'è previs tenor la Charta. Il Comité d'expertas e d'experts ha l'incumbensa d'examinar la situaziun da las linguas regionalas u minoritaras en mintga stadi, da communitgar al Comité dals ministers ses giudicament areguard l'observaziun da las obligaziuns tras ina partida contractanta e – nua che quai è applitgabel – da supplitgar la partida contractanta d'extender pass per pass sias obligaziuns. Mintga stadi contractant po delegar ina commembra u in commember en il comité. Las expertas ed ils experts ageschan independentamain dal stadi incaricant ed èn emprima lingia responsabels per evaluar la situaziun da las linguas regionalas e minoritaras en auters stadis contractants. Ellas ed els vegnan elegids per ina perioda da sis onns e pon vegnir reelegids ina giada.

Il mandat n'è betg pajà; ils custs da viadi, da pernottaziun e d'alimentaziun vegnan dentant indemnissads cun ina pauschala per di che vegn pajada dal Cussegl da l'Europa tenor ses urden da gestiun.

L'experta u l'expert da la Svizra vegn tscherni dal Comité dals ministers dal Cussegl da l'Europa or d'ina glista che sto cuntegnair almain trais propostas dal DFI.

#### INCUMBENSAS

##### Sco commembra u commember ordinari dal Comité d'expertas e d'experts

- Sa participar a las trais dietas plenaras che han lieu mintga onn durant plirs dis a Strassburg.
- Sa participar a las visitas en in auter stadi contractant; en quest connex ha mintga experta u expert la responsabladad da rapportar davart in pajais e da rediger il rapport d'evaluaziun. Retschaiver il Comité d'expertas e d'experts a chaschun da sia visita en Svizra, sa participar a la discussiun concernent la deliberaziun dal rapport davart la Svizra.

##### Chaussas generalas

- Cooperar a mesiras da sensibilisaziun, a debattas ed ad occurrenzias concernent las linguas regionalas u minoritaras sco er a render enconuschenta la Charta, particularmain en Svizra.

#### QUALIFICAZIUNS E CUMPETENZAS NECESSARIAS

##### Tenor las prescripziuns dal Cussegl da l'Europa

- Integritad, independenza envers las autoritads ed imparzialitad en l'execuziun dal mandat.
- Cumpetenzas specificas cumprovadas, q.v.d.
  - enconuschientschas giuridicas cumplexsivas en dretg constituziunal u en dretg internaziunal u
  - experientscha en almain in dals secturs da la vita publica pertutgads da la Charta (furmaziun, medias, giustia, administraziun publica, cultura, fatgs socials e vita economica), cun accent sin dumondas en connex cun las linguas minoritaras u
  - cumpetenza u spezialisaziun cumprovada sin il sector da la politica da linguas.
- Bunas cumpetenzas linguisticas dal franzos u da l'anglais, ch'èn las linguas uffizialas e las linguas da lavur dal Cussegl da l'Europa.
- Disponibladad da temp per pudair ademplir efficaciamain il mandat.

##### Ulteriuras pretensiuns

- Bunas enconuschientschas da las instituziuns svizras e da la situaziun da las linguas regionalas e minoritaras en Svizra.
- Gronda cumpetenza sociala ed abilitad exprimida da lavurar en in team.
- Enconuschientschas excellentas d'almain duas fin trais linguas naziunalas da la Svizra.

##### Giavischè vegn plinavant

- Enconuschientschas u experientschas areguard il Cussegl da l'Europa e sias metodos da lavurar u experientscha en ina posiziun da responsabladad en il sector da las relaziuns internaziunalas.

##### Vossa annunzia

Trametta per plaschair Vossa annunzia ensemen cun Voss curs da la vita **en franzos u en anglais**, utilisond il model dal curs da la vita dal Cussegl da l'Europa (da retrair sin dumonda tar [kultur\\_gesellschaft@bak.admin.ch](mailto:kultur_gesellschaft@bak.admin.ch) fin ils **3 da schaner 2022 per e-mail** a: [kultur\\_gesellschaft@bak.admin.ch](mailto:kultur_gesellschaft@bak.admin.ch))

##### Ulteriuras infurmaziuns

Uffizi federal da cultura, Secziun Cultura e societad, Fiona Häusler, tel. +41 58 462 49 51